

**Jetzt wisses alli rund um d Uhr
Basel isch Wältkultur!**

Also ... bi dr Süsche waal
hesch wye immer d Waal der Quaal.
Mir hogge alli nüün am Disch
und sueche was do z mache isch.
Dr Obmaa sait nach em begriesse
s isch wichtig hüt was mir beschliesse!

Ain schwätzt em dry, sait: Ich möcht saage
mir nämme unsre alte Waage
s goot um dä blöödi Waagebau,
dasch nit vo mir das sait my Frau.
Mir dien doch das Joor jubiliere
me könnt das so dokumentiere.

Wär hät e andre Vorschlag z mache,
dasch wye e Witz well alli lache.
Dr Süsche obmaa wo duet moole
duet e bitz muff zum Schlag usshoole,
mir dien am Waage gar nüt spaare
sunscht könntet Ihr uff Rollschuh fahre.
Mit diskudiere höre mir uff
ich mach Fasnachtsfigure druff
und mach e Skaylain vorne duure
und jetz isch Rueh jetz halti s Muul
bis im Septämber; Sali zämme
s isch Zyt dass mir jetz aine nämme

Jetzt hogge mir do, es isch Septämber
nach „Emil Steinberger“, draisch scho warmi Hämber
und immer no kai Waagebau
nur glüggig isch dehaime d Frau.
E guete Süschevorschlag het e kaine
und schaffe duet bis jetz nur aine
und s 35 jährige Jubilo
het au no gar kai Form a gno.
Doch denn kunnt d Rettig me gseet s Zyl
es isch nit ... Fischers Wädiswyl,
nai Wältkultur stoot in dr BAZ
Unesco-Erb e wytere Satz.

Und jetz blöfft s Fasnachtscomité
sy haige das vo Afang a gsee,
dr Christof Bürgi und von Rohr
singe wye e Gospelchor.

E Loblied wye sy das hän gschaffe
das 24 Stügg dien gaffe.
In Jeju ... wo das au immer isch
hogge Mitglider um e Disch
und nämme denn mit vyl Hurra
d Bewärbig Bürgi von Rohr a!

Ändlig ... Süsche isch geboore
und mir hän kai Zyt verloore
au mit em Waage gits kai Buff
Baslerfigure sinn guet druff:
zum Byspyl isch dye alti Dante
druff mit alle de Verwandte

drumm isch dr Waage uff dr Spur
mit Unesco Erb und Wältkultur.
Das muess jetz schnäll in Rädäbäng
mir lyyde unter settige Zwäng
drumm innerlig mängmoll verwürgi
e Felix von Rohr und dr Bürgi!

No öbbis wo zum schrybe zwinggt
was das jetzt uns in Zuekunft bringt
und welli Richtig das ka nä
das möcht ich do gärn wytter gö.
Vermuetlig well sich das duet loone
kömme Turische jetz ... Millione,
in Ritschkas kömme d Koreaner
und in Greyhaunds Indianer,
uff Hundeschlitte d Eskimo,
in Hondas dye uss Tokio.
Und alli wänn in Hotel wohne
do kasch au Skylain nit verschone,
als erschts do baut me s Roothus um
s neu Hotel haisst Politikum,
und kaine wird entlassewell
e jeede griegt dört in e Stell.
Vilicht nit jede nimmt me mit
denn mänge IQ längt do nit!
So duet me Huus um Huus umbau
und duet e so dye Stadt versaue!

Jä guet das muess jo nit so ko
me ka dye Stadt jo au so lo,
und s Wichtigschte in unsrer Runde
mir hän unser Süsche gfunde.
Und no wichtiger als dr Rütlichwur
mir sinn d Erbe vonere Wältkultur!

*D' Ladäärneusstellig isch vom Fasnachtsmändig z nacht, em
19. Hornig bis am Fasnachtsmittwuch demorge, em 21. Hornig
uff em Minschterplatz. Me kaa dert au die ganz Buschle
Zeedel, dr Rädäbäng und d' Blaggedde kaufe. Uff em
Kasäärneareal sin zer glyche Zyt d' Requisite und d' Wääge z
bschaue. Mir fraie ys uff iire Bsuech.*